

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 18 MAC 2019 (ISNIN)

SOALAN NO : 31

Minta **PERDANA MENTERI** menyatakan perancangan pelan perpaduan rakyat oleh Kementerian dalam masa 5 tahun akan datang.

JAWAPAN

Yang Di Pertua,

Jabatan Perpaduan Negara dan Integrasi Nasional (PERPADUAN) dari masa ke semasa sentiasa merancang inisiatif dan strategi tertentu melalui pelan tindakan perpaduan bagi terus memelihara dan mengekalkan keharmonian antara masyarakat berbilang kaum di negara ini. Antara inisiatif dan strategi yang telah dirancang adalah seperti berikut:-

a) Menjenamakan semula Majlis Konsultasi Perpaduan Negara (MKPN) kepada Majlis Perundingan Keharmonian Rakyat (MPKR) di mana ianya akan menjadi satu platform ke arah penyatuan nasional (*national reconcilliation*) bagi mengurangkan polarisasi kaum dan membina bangsa Malaysia yang bersatu padu. Penubuhannya adalah untuk membincangkan isu-isu sukar dalam kalangan masyarakat Malaysia yang kompleks serta merintis jalan penyelesaian ke arah merapatkan jurang yang menghalang perpaduan. Selain itu, Majlis ini akan berperanan mewujudkan kesedaran dan memupuk nilai-nilai murni dalam kalangan rakyat Malaysia agar bersikap moderat bagi mengelakkan perpecahan antara kaum dan agama.

SOALAN NO : 31

Langkah ini adalah selaras dengan aspirasi dan hasrat kerajaan baharu untuk mewujudkan urus tadbir negara yang baik, progresif dan inklusif ke arah menjamin kesejahteraan hidup seluruh rakyat negara ini tanpa mengira latar belakang kaum, bangsa dan agama;

b) Cadangan penubuhan Suruhanjaya Keharmonian dan Rekonsiliasi Nasional (*National Harmony Reconciliation Commission*) bagi menangani isu-isu sensitif yang timbul akibat kesalahfahaman antara masyarakat Malaysia yang terdiri dari pelbagai kaum, etnik, agama, keturunan dan budaya. Penubuhan suruhanjaya ini dapat mengatasi isu dan sentimen perkauman yang cuba dimanipulasikan oleh pihak-pihak tertentu bagi kepentingan sendiri bagi memecah-belahkan rakyat;

c) Pembangunan Instrumen Indeks Perpaduan Nasional sebagai suatu model struktur yang komprehensif di peringkat nasional untuk mengukur dan memantau tahap pencapaian perpaduan di Malaysia secara saintifik dan sistematik menggunakan data empirikal yang diperolehi daripada masyarakat Malaysia. Indeks ini dibina berdasarkan beberapa konstruk tertentu yang meliputi seperti tahap keetnikan, hubungan sosial rentas etnik, etos bangsa, tadbir urus dan pembangunan, kesepaduan sosial dan lain-lain lagi yang akan menjadi kayu pengukur kepada tahap perpaduan negara ini. Indeks ini akan menjadi alat pemantauan peringkat nasional yang dapat memperlihatkan keperluan program intervensi sebenar oleh Kerajaan kepada masyarakat berdasarkan isu-isu semasa yang berlaku kerana nilai indeks yang diukur akan menjadi satu petunjuk sebenar pencapaian tahap perpaduan di Malaysia kelak;

d) Menjadikan kaedah mediasi komuniti sebagai usaha berterusan untuk menangani pertikaian, pertelingkahan dan persengketaan dalam komuniti setempat yang terdiri dari penghuni yang berbilang kaum dan agama dengan meningkatkan bilangan mediator komuniti yang terlatih di seluruh negara. Dengan cara ini, konflik yang wujud di peringkat akar umbi dapat ditangani dengan lebih berkesan sebelum ianya menular menjadi lebih besar dan mencetuskan pergaduhan, serangan ataupun rusuhan kaum;

e) Pemerkasaan Jabatan Perpaduan Negara dan Integrasi Nasional melalui langkah meremajakan agen-agen perpaduan di peringkat akar umbi agar mereka dapat berkhidmat kepada komuniti tanpa sebarang prejudis dan prasangka sesama mereka agar selari dengan usaha kerajaan bagi melahirkan bangsa Malaysia yang berdikari, inovatif dan kreatif. Selain itu, Jabatan juga telah membuat anjakan paradigma dengan mengadakan kerjasama dan kolaborasi strategik dengan pelbagai pertubuhan, badan bukan kerajaan (NGO), kelab dan sektor swasta, institusi pengajian tinggi bagi memastikan mereka dapat menyumbang dengan melakukan usaha-usaha mempromosikan perpaduan sebagai memenuhi sebahagian daripada tanggungjawab sosial mereka melalui pelaksanaan pelbagai program seperti dialog antara penganut agama, larian perpaduan, pemberian pengiktirafan terhadap ikon-ikon perpaduan, hari toleransi, anugerah Rukun Tetangga, MyHero Awards;

f) Jabatan Perpaduan Negara dan Integrasi Nasional juga komited dalam terus menerajui pendidikan perpaduan memandangkan inisiatif-inisiatif pemupukan perpaduan bermula di peringkat pra-sekolah lagi. Jabatan bercadang meningkatkan kualiti guru-guru di Tabika dan Taska Perpaduan melalui latihan yang lebih komprehensif agar mereka dapat mendidik anak-anak kecil sejak di bangku sekolah lagi untuk menghargai perpaduan yang merupakan hadiah yang tidak ternilai terutamanya di negara ini yang masyarakatnya terdiri dari pelbagai keturunan kaum, agama dan budaya. Ini kerana sekiranya anak-anak dipupuk dengan pengamalan nilai-nilai murni sejak kecil seperti sikap saling hormat-menghormati, bekerjasama, bertoleransi, bersifat patriotik dan menghargai kepelbagaian masyarakat yang wujud di Malaysia, nescaya sentimen-sentimen perkauman tidak lagi akan menggugat generasi akan datang dan mereka tidak mudah terpengaruh dengan berita-berita yang diviralkan dan anasir-anasir yang jahat;

g) Meneruskan pelaksanaan program-program sedia ada seperti Program Sayangi Komuniti (PSK) yang telah disasarkan untuk dilaksanakan di 456 lokasi miskin bandar dan pinggir bandar (B40) bagi meningkatkan keharmonian masyarakat setempat agar mereka

hidup dengan selamat, aman dan sejahtera. Pelaksanaan PSK telah mencapai sasaran sebanyak 103 lokasi sehingga tahun 2018 dan akan diteruskan di 49 lokasi baru yang disasarkan pada tahun 2019 dan 48 lokasi baru pada tahun 2020 bagi membolehkan PERPADUAN melaksanakan pelbagai aktiviti dan program bersama penduduk melalui kerjasama strategik dengan pelbagai agensi dan badan bukan kerajaan (NGO) bagi membendung, menangani dan menyelesaikan isu/masalah yang dihadapi oleh penduduk sebagai salah satu usaha untuk mengintegrasikan masyarakat pelbagai kaum di kawasan ini agar dapat terus memelihara perpaduan negara dan kesejahteraan sosial; dan

h) Pelaksanaan Program Latihan Industri Perpaduan (PLIP) turut diteruskan kerana ia merupakan salah satu platform untuk mengintegrasikan golongan muda melalui program *internship* di syarikat-syarikat swasta dan *Government Linked Companies* (GLCs) sebagai usaha untuk menggalakkan perkongsian silang kerjaya dan budaya antara golongan mahasiswa universiti yang terdiri dari pelbagai kaum dan latarbelakang keturunan. Bermula dari 2015 hingga 2018, seramai 5,218 orang pelajar telah menyertai program ini.

PERPADUAN telah merancang untuk melipatgandakan pelbagai usaha untuk membentuk masyarakat yang lebih bersatu-padu dan berintegrasi di negara ini, namun usaha-usaha tersebut tidak dapat dilaksanakan tanpa kerjasama semua pihak kerana usaha memelihara perpaduan bukanlah tanggungjawab kerajaan semata-mata tetapi tanggungjawab bersama semua lapisan masyarakat di negara ini.

Sekian, terima kasih.